

傷  
科  
彙  
纂

傷科彙纂卷之三

蕭山晴川胡廷光耀山甫纂輯

手法總論

醫宗金鑑總論曰夫手法者謂以兩手安置所傷之筋骨使仍復於舊也但傷有輕重而手法各有所宜其痊可之遲速及留遺殘疾與否皆關乎法之所施得宜或失其宜或未盡其法也蓋一身之骨體既非一致而十二經筋之羅列序屬又各不同故必素知其體相識其部位一旦臨症機觸於外巧生于內手隨心轉法隨手

出或拽之離而復合、或推之就而復位、或正其斜、或完其闕、則骨之截斷、碎斷、斜斷、筋之弛縱、卷攣、翻轉、離合、雖在肉裏、以手捫之、自悉其情、法之所施、使患者不知其苦、方稱爲手法也。況所傷之處、多有關於性命者、如七竅上通腦髓、逼近心君、四末受傷、痛苦入心者、即或其元氣素壯、敗血易于流散、可以尅期而愈、手法亦不可亂施。若元氣素弱、一旦被傷、勢已難支、設手法再悞、則萬難挽回矣。此所以尤當審慎者也。蓋正骨者、須心明手巧、既知其病情、復善用夫手法、然後治自多效、誠

以手本血肉之體其宛轉運用之妙可以一已之卷舒高下疾徐輕重開合能建病者之血氣凝滯皮肉疼痛筋骨攣折與情志之苦欲較之以器具從事于拘制者相去甚遠矣是則手法者誠正骨之首務哉

### 模法

醫宗金鑑曰摸者用手細細摸其所傷之處或骨斷骨碎骨歪骨整骨軟骨硬筋強筋柔筋歪筋整筋斷筋走筋粗筋翻筋寒筋熱以及表裏虛實並所患之新舊也先摸其或爲跌撲或爲錯閃或爲打撞然後依法治之

接法

醫宗金鑑曰接者謂使已斷之骨合龍一處復歸于舊也凡骨之跌傷錯落或斷而兩分或折而陷下或碎而散亂或岐而傍突相其形勢徐徐接之斷者復續陷者復起碎者復完突者復平或用手法或用器具或手法器具先後而兼用之是在醫者之通達也

端法

醫宗金鑑曰端者或兩手一手擒定應端之處酌其輕重或從下往上端或從外向上托或直端斜端也蓋骨

離其位必以手法端之則不待曠日持久而骨縫即合  
仍須不偏不倚庶愈後無長短不齊之患

### 提法

醫宗金鑑曰提者謂陷下之骨提出如舊也其法非一  
有用兩手提者有用繩帛繫高處提者有提後用器具  
輔之不致仍陷者必量所傷之輕重淺深然後施治倘  
重者提輕則病莫能愈輕者重提則舊患雖去而又增  
新患矣

### 按摩法

醫宗金鑑曰按者謂以手往下抑之也摩者謂徐徐揉摩之也此法蓋爲皮膚筋肉受傷但腫硬麻木而骨未斷折者設也或因跌撲閃失以致骨縫開錯氣血鬱滯爲腫爲痛宜用按摩法按其經絡以通鬱閉之氣摩其壅聚以散瘀結之腫其患可愈

### 推拿法

醫宗金鑑曰推者謂以手推之使還舊處也拿者謂兩手一手捏定患處酌其宜輕宜重緩緩焉以復其位也若腫痛已除傷痕已愈其中或有筋急而轉搖不甚便

利或有筋縱而運用不甚自如。又或有骨節間微有錯落不合縫者。是傷雖平而氣血之流行未暢。不宜接整端提等法。惟宜推拿以通經絡氣血也。蓋人身之經穴有大經細絡之分。一推一拿視其虛實酌而用之。則有宣通補瀉之法。所以患者無不愈也。

註云。已上諸條乃八法之大畧如此。至于臨症之權衡。一時之巧妙神而明之。存乎其人矣。

耀山云。八法之外。又有推骨入髀秘法。或用肩頭搦。或用足跟搦。搦者如挑負然。將患人搦起。骨入



膠矣較之用手拉手拽更覺有力多矣。坐者或坐其上或卧於地兩手將患人擒住隨用足跟竿去比之用手推托便捷甚矣此秘法也故附八法之後以補手法之未備也

### 器具總論

醫宗金鑑總論曰跌撲損傷雖用手法調治恐未盡得其宜以致有治如未治之苦則未可云醫理之周詳也爰因身體上下正側之象製器以正之用輔手法之不逮以異分者復合歆者復正高者就其下陷者陞其位

則危症可轉于安、重傷可就於輕、再施以藥餌之功、更示以調養之善、則正骨之道全矣。

### 裹帘

醫宗金鑑曰、裹帘以白布爲之、因患處不宜他器、只宜布纏、始爲得法、故名裹帘、其長短闊狹、量病勢用之。

### 振挺

醫宗金鑑曰、振挺即木棒也、長尺半、圓如錢大、或麴杖亦可、蓋受傷之處、氣血凝結、疼痛腫硬、用此挺微微振擊其上下四傍、使血氣流通、得以四散、則疼痛漸減、腫

硬漸消也

釋義云凡頭被傷而骨未碎筋未斷雖瘀聚腫痛者皆爲可治先以手法端提頸項筋骨再用布纏頭二三層令緊再以振挺輕輕拍擊足心令五藏之氣上下宣通瘀血開散則不奔心亦不嘔呃而心神安矣若已纏頭拍擊足心竟不覺疼昏不知人瘦响如拽鋸身體僵硬口流涎沫乃氣血垂絕也不治

披肩

醫宗金鑑曰披肩者用熟牛皮一塊長五寸寬三寸兩頭各開二孔夾於傷處以棉繩穿之緊緊縛定較之木板稍覺柔活

釋義云凡兩肩撲墜閃傷其骨或斷碎或傷突或斜努或骨縫開錯筋翻法當令病人仰卧凳上安合骨縫揉按筋結先以棉花貼身墊好復以披肩夾住肩之前後縛緊再用白布在外纏裹畢更用扶手板長二尺餘寬三四寸兩頭穿繩懸空掛起令病者俯伏於上不使其肩骨下垂過七日後開

視之如俱痊可，撒板不用。如尚未愈，則仍用之。若不依此治法，後必遺患蘆節。

耀山云：用水竹半邊，長短濶狹，以患處爲則，削去稜角，嵌入肩內。其肩下腋肌，再用棉團一箇，實其腋內外，以布帶縛定，繫住。此治肩骨斷碎之具。雖比板物較硬，然用之得法，縛之妥貼，則無動移之患矣。

### 攀索

醫宗金鑑曰：攀索者，用繩掛於高處，以病人兩手攀之。

也。

# 疊甄

醫宗金鑑曰：疊甄者，以甄六塊，分左右各疊置三塊，令病人兩足踏于其上也。

釋義云：凡胸腹脘脇跌打崩撞墊努，以致胸陷而不直者，先令病人以兩手攀繩，足踏甄上，將後腰拿住，各抽去甄一塊，令病人直身挺胸，少頃又各抽去甄一塊，仍令直身挺胸。如此者三，其足着地，使氣舒痰散，則陷者能起，曲者可直也。再將其胸

以竹簾圍裹用寬帶八條緊繫縛之勿令窒碍但  
宜仰卧不可俯卧側卧腰下以枕墊之勿令左右  
移動

### 通木

醫宗金鑑曰用杉木寬三寸厚二寸其長自腰起上過  
肩一寸許外面平正向脊背之內面刻凹形務與脊骨  
贅肉吻合約以五分度之第一分斜鑽二孔在于左右  
兩側外面越第二分至三分四分五分俱自左右側面  
各斜鑽一孔用寬帶一條自第一分上左孔穿入上越

布纏之復以竹簾圍於布外緊紮之使骨縫無參差走作之患蓋通用之物也

### 杉籬

醫宗金鑑曰杉籬者復逼之器也量患處之長短濶狹直曲凸凹之形以杉木爲之酌其根數記清次序不得紊亂然後于每根兩頭各鑄一孔以繩聯絡之有似乎籬故名焉但排列稀疏不似竹簾之密也

釋義云凡用以圍裹于竹簾之外將所穿之繩結住再于籬上加繩以纏之取其堅硬挺直使骨縫



無離綻脫走之患也。蓋骨節轉動之處與骨筋甚長之所易于搖動。若僅用竹簾恐挺勁之力不足。故必加以環抱之。則骨縫吻合堅牢矣。

陳遠公曰：有跌打骨折，必用杉木或杉板將折骨湊合端正，以繩縛定，勿偏斜曲。再以布紮，不可因疼痛心軟，少致輕鬆，反爲害事。後用內服藥，如皮破血出，須用外治藥。但骨折而外邊之皮不破，即不用外治之藥。然內外夾攻，未嘗不更佳耳。內治法宜活血去瘀爲先，血不活則瘀不去，瘀不去則

骨不能接也。內治用接骨神丹煎服。外治貼全體神膏。再加末藥勝金丹。搽傷處爲妙。每膏一張用末藥三錢。搽膏上貼之。凡接骨不須二個。至重則用二個。此絕竒絕異之方。倘未損傷。只貼膏藥。不必用勝金丹。搽藥。內外治法。三方有不可形容之妙。醫者患者。得以旦夕奏功。故特爲表出。方出水鑑。

谷蘭云。損傷固痛。因痛而以板木縛之。則愈痛。愈痛而手軟心軟。轉致輕鬆。是痛其痛。反增其痛。這

至不可醫藥悔何及哉學者務熟習手法臨症時得自然之妙自無手軟心軟之弊矣

耀山云凡臂骨及小兒頸骨腿骨犬手膊骨截斷折斷碎斷斜斷者不必用大杉籬僅用杉木皮儘可將杉木皮削去粗皮或三片或二片如指面大長短以患處爲則况杉木皮似竹樣閣漏式合於骨處極爲妥貼又杉木皮挖空用紙粘裹可縛手肘手腕使其能轉能伸能屈能曲此夾紮中之活法也又有竹篾大片再以紙包或用三片四片者

患處之寬狹長短定爲法則又有松木薄板像今  
做糕匣者用紙包裹安于骨斷之處以棉帶緊緊  
甚妙此皆常用驗過之器具也

### 抱膝

醫宗金鑑曰抱膝者有四足之竹圈也以竹片作圈較  
膝蓋稍大些須再用竹片四根以麻緊縛圈上作四足  
之形將白布條通纏於竹圈及四足之上用於膝蓋雖  
拘制而不致痛苦矣

釋義云膝蓋骨覆於髌骨之端本活動物也若  
傷科彙纂

有所傷、非骨體破碎、即離位而突於左右、雖用手  
法推入原位、但步履行止、必牽動於彼、故用抱膝  
以固之、庶免復離原位、而遺跛足之患也、其法將  
抱膝四足、挿於膝蓋兩傍、以竹圈轄住膝蓋、令其  
穩妥、不得移動、再用白布寬帶、緊緊縛之、

耀山云、膝蓋骨跪碎、或跌碎者、常用紙竹毛蔑、纏  
繞一筭、與膝蓋大小相等、再加四繩縛於筭上、貼  
膏藥後、即將箴筭安上、四繩分前後縛之、較之竹  
圈、稍覺柔軟矣、

又云、以上器具、皆傷科必用之物、又增補試驗各  
具、然未備也、有肩胛出臼、用布帶纏於手上、繫於  
柱間、在帶上撈者、有腿骨出髁、用濶帶縛定腿足、  
將人抱住、以大榔頭嚇者、有用硬挺者、有用軟騙  
者、種種器具、總不出縛纏夾紮挺托之法、復其原  
位、使勿游移活動爲得耳、要在人之活法變動也、  
選粹云、凡損傷平處、骨斷骨碎、皮不破者、用接骨  
定痛等膏敷貼、若傷在手足、曲直伸縮之處、要用  
包裹、可令時時轉動、指骨碎者、只用麻片夾縛、腿

上用麻繩紮縛冬月熱縛夏月涼縛餘月溫縛又云骨斷皮破者不可用酒煎藥或損在內而皮破者可加童便於破血藥內和服若骨斷皮不破者可全用酒煎藥若只傷而骨不折肉不破者用消腫膏或定痛膏又云皮裏有碎骨只用定痛膏敷貼夾縛如十分傷重自然爛開其肉碎骨自出然後用補肌散外以補肉膏敷貼又云夾縛處須藥水以時泡洗春秋三日夏二日冬四日洗去舊藥須仔細勿驚動傷處洗訖仍用前藥前膏敷縛凡

換藥不可生換，須用手巾打濕搨潤，逐片取脫，隨手盪洗，換上又不可停留，一時刻藥膏必須預爲攤就，隨手換上，此乃敷藥之訣。如換膏藥亦然。

### 接骨歌訣

接骨由來法不同

編歌依次說全功

若能洞達其中意

妙法都歸掌握中

骨折大凡手足多

或短或長或脫窠

或凹或凸或歪側

務將手足慎撫摩

長者脫下短縮上

突凹歪斜宜度量



身上骨若斷而分  
內如脉動一般呵  
整骨先服保命丹  
手足斷須扯捻好  
先須脚底牢實  
足跟之下更高  
如不牢實骨尚長  
此爲縮法之手功  
歪從患骨下托起

須用三指摩的當  
骨折斷碎無別何  
酒下骨軟方動他  
足斷而長添一勞  
斷傷骨下微高  
病痊無患自證驗  
以後愈長長可厭  
手長難療成廢躬  
扯直無歪歸於同

合莫不還還原樣  
試手必以兩手齊  
復白膏藥自急需  
長短濶狹隨患處  
將膏緊裹包貼定  
浸軟漸刮去粗皮  
還當排得緊重重  
經布濶宜二寸許  
布上再紮三條帶

凹者捻妥無別尚  
試足須將脚並放  
光細布攤稱體膚  
膏宜攤厚糝多鋪  
夾非杉皮力不勝  
板長患處短方稱  
夾上布經經莫鬆  
從上至下盡力封  
中間上下護要害

先縛中間後兩頭  
如縛手足斜折斷  
骨斷若如截竹樣  
氣血斷處來聚着  
脚要米袋兩邊挨  
對症湯丸日日施  
三七之時骨接牢  
紫金丹作收功例  
我今編此手法歌

寬緊得宜始安泰  
中間緊而兩頭寬  
中寬聚氣緊兩端  
手用帶兒覆掌絡  
挨定不動勝妙藥  
藥洗換膏三日期  
房事油腥犯不宜  
骨仍堅固無流弊  
傳與後人須仔細

上膠歌訣

上膠不與接骨同  
宜輕宜重爲高手  
法使驟然人不覺  
茲將手法爲歌訣

托下巴歌訣

頭骨圓圓曰髑髏  
單邊爲錯雙邊落  
兩指口中齊重捺

全憑手法及身功  
兼嚇兼諱是上工  
患如知也骨已攏  
一法能通萬法通

下巴骨脫兩般求  
上似彎環下似鉤  
各腮頰外共輕揉

下巴往裡徐徐托

托上還須用帶兜

### 提頸骨歌訣

人登高處忽逢驚

首先墜頸骨項

面仰難垂惟伸續

頭低不起則端擎

腔中插入須提拔

骨上歪斜要整平

再看有無他磕碰

臨時斟酌度其情

### 整背腰骨歌訣

脊背腰樑節節生

原無脫髁亦無傾

腰因挫閃身難動

背或偃倭骨不平

大抵脊筋離出位  
將筋按捺歸原處

至於骨縫裂開彌  
筋若寬舒病體輕

上肩膠歌訣

損傷肩膊手筋攣

骨膠猶如杵臼然

若是肘尖彎在後

定當臑骨聳於前

常醫或使兩人拉

捷法只須獨自搗

倘遇婦人難動手

論中帶嚇秘家傳

托肘尖歌訣

臂膊之中曰肘尖

凸凹上下骨鑲黏

直而不曲筋之病  
骨裂縫開翻托好  
仍當養息懸於項

屈若難伸骨有嫌  
筋橫縱急搦安恬  
屈曲時時疾不添

### 授手腕歌訣

腕似農車水骨聯  
行車竭鑿應防覆  
手必先迎筋反錯  
輕輕搦骨歸原處

仰翻俯覆曲如旃  
走馬馳驅或致顛  
掌如後貼骨開偏  
骨若還原筋已痊

### 上大腿膠歌訣

環跳穴居跨骨前  
筋翻腫結脚跟起  
宜用手椅并脚竿  
女人隱處手難動  
推膝蓋骨歌訣

膝骨形圓蓋膝間  
蓋移腿上腰跨痛  
若出外邊筋腫大  
推筋捺骨歸原位

中分杵臼似機旋  
骨錯斜行腿足蹠  
或施布縛及繩懸  
吊住身軀隔壁牽

原係活動各筋板  
骨走臙中步履艱  
如離內側脰難彎  
抱膝相安何足患



拽脚踝拐歌訣

足趾足跟踝相并

傷筋動骨致難行

脚尖向後應知挫

踝骨偏斜定是痔

骨突骨坳宜摸悉

筋翻筋結要分清

筋須揉撥又須拽

筋若調勻骨亦平

耀山云骨膠者兩骨相交活動之處也如杵之臼如戶之樞又如桔槔之有機以筋聯絡之故能轉運而不碍若脫膠者筋必受傷是以上膠必先理其筋也前接骨歌係陳氏秘傳法該而脩惟原稿

韻脚未妥，稍爲潤色之。脫稿之後，復撰上膠歌訣十首，未敢言工，聊便誦記而已。按骨膠之膠字，音料，乃尻骨上有八孔，謂之八膠。葉氏醫案云：接骨上骺，骺音戛，小骨也。或有用作竅，用作竅均未切當。薛氏正體類要有骨膠接而後脫之句，今仍借用之。

傷科彙纂卷之四

蕭山晴川胡廷光耀山甫纂輯

方法總論

醫宗金鑑總論曰。今之正骨科。即古跌打損傷之證也。專從血論。須先辨。或有瘀血停積。或爲亡血過多。然後施以內治之法。庶不有悞也。夫皮不破而肉損者。多有瘀血。破肉傷脰。每致亡血過多。二者治法不同。有瘀血宜攻利之。亡血者宜補而行之。但出血不多。亦有瘀血者。以外治之法治之。再察其所傷。上下輕重淺深之異。

經絡血氣多少之殊必先逐去瘀血和榮止痛然後調養血氣自無不效若夫損傷雜症論中不及備載者俱分門晰類詳列於後學者宜盡心焉

選粹云大法因以血之或瘀或失分虛實而爲補瀉亦當看傷之輕重輕者頓挫氣血凝滯作痛此當導氣行血而已若重者傷筋折骨如欲接續非數月不瘥若氣血內停沮塞真氣不得行者必死急瀉其血通其氣庶可施治又云出血太多頭目昏眩先用川當歸大川芎水煎服次加白芍藥熟

地黃續斷防風荆芥羌獨活南星煎加童便不可  
用酒如血出少內有瘀血以生料四物湯一半加  
獨聖散水煎服皮肉未破者煎成加酒服

### 內證

醫宗金鑑曰跌打損傷墜墮之證惡血留內則不分何  
經皆以肝爲主蓋肝主血也故敗血凝滯從其所屬必  
歸于肝其痛多在脇肋小腹者皆肝經之道路也若墜  
腫痛甚或發熱自汗皆宜斟酌虛實然後用調血引經  
之藥王好古云登高墜下撞打等傷心腹胸中停積瘀  
易斗定長

血不散者則以上中下三焦分別部位以施藥餌。瘀在上部者宜犀角地黄湯。瘀在中部者宜桃仁承氣湯。瘀在下部者宜抵當湯之類。須於所用湯中加童便好酒同煎服之。虛人不可下者宜四物湯加穿山甲。若瘀血已去則以復元通氣散加當歸調之。內經云形傷作痛氣傷作痛。又云先腫而後痛者形傷氣也。先痛而後腫者氣傷形也。凡跌撲閃錯或惱怒氣滯血凝及元氣素弱或因叫號血氣損傷或過服剋伐之劑或外敷寒涼之藥致血氣凝結者俱宜用活血順氣之劑。後列諸方。

以備選用

可法良規云凡傷損之症若誤飲涼水淤血凝滯氣道不通或血上逆多致不救若入於心即死急飲童便熱酒以和之若患重而淤血不易散者更和以辛溫之劑睡臥要上身墊高不時喚醒勿令熟睡則血庶不上逆故患重之人多爲逆血填塞胸間或閉塞氣道咽喉口鼻不得出入而死

選粹云損傷寒涼之藥一毫俱不可用蓋血見寒則凝若冷飲致血入心而死惟看有外傷者當內

外兼治若外無所傷內有死血唯用蘇木等治血之藥可下者下之鷄鳴散是也

可法良規云凡損傷之症外固不宜敷貼硝黃之類恐濟寒以益其傷若人平素虛弱雖在夏令內服亦不宜用鹹寒之品蓋胃氣得寒而不生運氣得寒而不健瘀血得寒而不能行腐肉得寒而不潰新肉得寒而不生若內有瘀血停滯服以通之不在此例

出血



正體類要曰若患處或諸竅出血者肝火熾盛血熱錯經而妄行也用加味道遙散清熱養血若中氣虛弱血無所附而妄行用加味四君子湯補益中氣或元氣內脫不能攝血用獨參湯加炮薑以回陽如不應急加附子或血蘊於內而嘔血用四物加柴胡黃芩凡損傷勞碌怒氣肚腹脹滿候服大黃等藥傷陽絡則爲吐血衄血便血尿血傷陰絡則爲血積血塊肌肉青黯此臟腑虧損經隧失職急補脾肺亦有生者

急救方云跌壓傷重之人口耳出血一時昏暈但

視面色尚有生氣，身體尚爲綿軟，則皆可救。但不  
可多人環繞，嘈雜驚慌，致令驚魄不復，急令親人  
呼而扶之，坐於地上，先拳其兩手，兩足緊爲抱定，  
少頃再輕移於相呼之人懷中，以膝抵其穀道，不  
令洩氣。若稍有知覺，即移於素所寢處，將室內憲  
櫺遮閉，令暗，仍拳手足緊抱，不可令卧，急取童便  
乘熱灌之，馬溺更妙。如一時不可得，即人溺亦可。  
要去其頭尾，但須未食葱蒜而清利者，強灌一二  
盃下，得喉便好。一面用四物湯三四倍加桃仁紅

花山查生大黃各二兩童便一大鍾如夏月加黃連四五分用流水急火在傍煎半熟傾入碗內承於傷者鼻下使藥氣入腹不致惡逆乘熱用小鍾灌服如不受少刻又灌藥盡不可使卧服藥之後其穀道尤須用力抵緊不可令洩其氣如藥性行動不可即解恐其氣從下洩以致不救也必須俟腹中動而有聲上下往來數遍急不可待方可令其大解所下盡屬淤紫毒已解半方可令睡至於所下盡爲糞即停止前藥否則再用一二劑亦不

碍然後次第調理不可輕用補藥

王肯堂云血溢血泄諸蓄妄證其始也予率以桃  
仁大黃行血破瘀之劑折其銳氣而後區別治之  
雖往往獲中然猶不得其所以然也後來四明遇  
故人蘇伊舉閒論諸家之術伊舉曰吾鄉有善醫  
者每治失血蓄妄必先以快藥下之或問失血復  
下虛何以當則曰血既妄行迷失故道不去蓄利  
瘀則以妄爲常曷以禦之且去者自去生者自生  
何虛之有予聞之愕然曰名言也昔者之疑今釋

然矣

又云凡九竅出血用南天竺主之或用血餘灰自  
髮爲佳次則父子一氣再次男胎髮又次則亂髮  
皂角水洗晒乾燒灰爲末每二錢以茅草根煎湯  
調下又荊葉搗取汁酒和服又刺薊一握絞汁酒  
半盞和服如無生者搗乾者爲末水調三錢均効  
訣曰墻頭苔蘚可以塞車前草汁可以滴火  
燒蓮房用水調鍋底黑煤可以喫石榴花片  
可以塞生菜服汁可以滴火燒龍骨可以吹

水煎茅花可以喫

聖惠方治諸竅出血用人中白一團鷄子大綿五兩燒研每服二錢溫水下

急救方註治跌打損傷已死者用男女尿桶人中白煉紅投好醋七次研末酒送二錢吐出惡血即可救矣慎不移動動者不治

泛注

醫宗金鑑曰損傷瘀血泛注之證乃跌仆血滯所致蓋氣流而注血注爲凝或注於四肢關節或留於胸腹腰

臂或漫腫或結塊初起皆屬肝脾鬱火急熨葱法內服  
小柴胡湯以清肝火次用八珍湯以壯脾胃或益氣養  
榮湯久服自然收功若日久潰破而氣血虛者宜十全  
大補湯若潰而寒邪凝滯不斂者宜豆豉餅祛散之此  
證若不補氣血不慎起居不戒七情或用寒涼剋伐俱  
屬不治

可法良規云凡損傷之症乃有形器物所傷為筋  
骨受病當從血論蓋血得熱則妄行其害甚速須  
先伐肝火清運火斂患處和經絡則瘀血不致泛

注肌肉不致遍潰次則壯脾胃進飲食生血氣降陰火則瘀血易於腐潰新肉易於收斂此要法也若用剋伐之劑虛者益虛滯者益滯禍不旋踵矣瀕湖集簡方治打撲瘀血滾注或作潮熱者用大黃末薑汁調塗一夜黑者紫二夜紫者白也

### 發熱

正體類要曰傷損發熱者若因出血過多或潰膿之後脉洪大而虛重按全無者此陰虛發熱也用當歸補血湯脉沉微按之軟弱者此陰盛發熱也用四君薑附若



發熱煩躁肉腠筋惕此亡血也用聖愈湯如汗不止者此血脫也宜獨參湯凡血脫之證其脉實者難治細小者易治

東垣曰晝則發熱夜則安靜是陽氣自旺於陽分也晝則安靜夜則發熱煩躁是陽氣下陷入陰中也名曰熱入血室如晝夜俱發熱煩躁是重陽無陰也當急瀉其陽而峻補其陰夫熱入血室之症婦人經水適來或因損傷謔言如見鬼狀宜小柴胡湯加生地主之王太僕曰凡熱來復去不時而

動乃無根之虛火也。宜六君子湯加薑桂不應急加附子。或八味丸最善。

可法良規曰。凡損傷之症。有出汗者。當審其陰陽虛實而治之。若陰虛陽往來之則發熱。自汗以甘寒之劑補其氣。如補中益氣湯之屬是也。若陽虛陰往來之則發厥。自汗以甘溫之劑助其陽。如參附湯之屬是也。亦有因痛甚而自汗者。宜清肝火為主。亦有因陰陽損傷而自汗盜汗者。宜補氣生血為主。若心孔一片汗出者。養其心血自止。

# 外邪

陳文治曰：四季傷損，脈浮緊，發熱惡寒，體痛屬有外邪。宜發散以祛邪。春用五積散，香蘇飲；夏用香薷飲，五苓散；秋用藿香正氣散；冬用雙解散。若寒熱者，加柴胡、前胡、黃芩；頭痛加川芎、白芷；腳氣加白芷、檳榔、木香；有痰加半夏、陳皮等分，葱白煎服。

可法良規云：凡傷損之症，出血太多，或潰爛之際，收斂之後，如有寒熱、頭痛，或自汗盜汗、煩躁作渴，或遍身疼痛、肢體倦怠、牙關緊急、痰涎上壅等症，

是血氣虛而作變症也。當峻補元氣爲主。大凡傷損症有外邪乃乘虛而入。猶當補助作外邪治之。禍不旋踵。

金鑑云。傷損之證。外挾表邪者。其脉必浮緊。證則發熱體痛。形氣實者。宜疎風敗毒散。形氣虛者。宜加味交加散。或羌活乳香湯以散之。

耀山云。傷損之證。內瘀居多。間有外感挾邪。陳氏之論。詳及四季發明。上下加減。雖爲穩當。又宜參閱發熱門擇方療治。更爲穩妥。學者須細玩之。

# 昏憤

正體類要曰傷重昏憤者急灌以獨參湯雖內有瘀血切不可下急用花蕊石散內化之蓋恐下之因瀉而亡陰也若元氣虛甚者尤不可下亦用前散以化之凡瘀血在內大小便不通用大黃朴硝血凝而不下者急用木香肉桂末三二錢以熱酒調灌服血下乃生如怯弱之人用硝黃須加肉桂木香假其熱以行其寒也

選粹云顛撲迷悶者酒調蘇合香丸灌之顛撲損傷者宜逐其惡血用酒煎蘇木調蘇合香丸或鷄

鳴散或活血和氣飲加大黃入醋少許煎或童便或蘇木煎酒調黑神散烏藥順氣散亦可

陳遠公曰人從高墜下昏死不甦人以為惡血奔心誰知乃氣為血壅乎夫跌撲之傷多是瘀血攻心然跌撲出其不意未必心動也惟從高墜下失足時心必驚悸自知必死是先挾一必死之心不比一蹶而傷者心不及動也故氣血錯亂每每昏絕不救治法逐其瘀血佐以醒脾之品則血易散而氣易閉倘徒攻瘀血則氣閉不宣究何益乎用

甦氣湯一劑氣疎三劑血活全愈

谷蘭云未跌撲之時心原不動當跌撲之時體先振動心能不動乎況心主血者也心既不動即跌撲亦無傷瘀之症矣此說存參

可法良規云凡傷損之症若皮膚已破出血過多而昏憤者氣血虛極也大補為主如不應急加附子若墜撲太重皮膚不破血未出而昏憤者瘀血在內也行散為主如不應速加酒炒大黃若下後而有變症者皆氣血虛極也用十全大補湯若因

痛甚而自汗昏憤者風木熾盛也用清肝涼血之劑則痛自定汗自止苟作外因風邪治之促其危也

又云若傷損在頭腦並致命處所昏憤良久將至不起者急用葱白切細杵爛炒熟罨患處稍冷更以熟者罨之多自醒矣

選粹云亦有血迷心竅而致昏沉不知人事者宜花蕊石散童便調服有神魂散失一時不知人事者唯在臨時斟酌大抵跌撲之病全在補氣行血



若自然銅之類雖有接骨之功而燥散之害甚于  
刀創丹溪脩言之矣

谷蘭云跌撲則肝必受傷瘀血未去而行補氣補  
血藥恐血瘀未能散除轉致不可救藥爲患惟虛  
弱者受跌撲之患於逐瘀中兼補益似爲兩得

急救方治撲打猝死去但須心頭溫煖雖經日亦  
可救先將死人盤屈在地上如僧打坐狀令一人  
將死人頭髮控放低用生半夏末以竹筒或紙筒  
吹在鼻內如活即以生薑自然汁灌之可解半夏

毒

本草綱目治打傷瘀血攻心者人尿煎服一升日  
一服此乃蘇恭本草方也又按外科發揮薛己云  
予在居庸見覆車被傷者七人仆地呻吟但令灌  
此皆得無事凡一切傷損不問壯弱及有無瘀血  
俱宜服此若脇脹或作痛或發熱煩躁服此一甌  
勝似他藥他藥雖效恐無瘀血反致誤人童便不  
動臟腑不傷氣血萬無一失軍中多用此屢試有  
驗

耀山云按人尿性味鹹寒無毒又名輪迴酒還元  
湯撲損瘀血在內運絕加酒飲之治折傷推陳致  
新其功甚大又千金方飲人尿治金瘡出血杖瘡  
腫毒火燒悶絕等症又刺在肉中人咬手指金瘡  
中風蛇犬咬傷蜂蠆螫傷浸洗得解乃傷科中之  
仙藥也周赧王四十五年秦相范雎在魏時觸忤  
魏齊令獄卒自辰至未撲打遍體皆傷齒折脇斷  
身無完膚氣絕不動屍卷葦薄之中魏齊復令賓  
客便溺其上勿容爲清淨之鬼至晚范雎死而復

蘇竟相秦國。又明季一官貪墨誣害平人。解緩時  
被受害人之子奪路報復。父仇攢毆已斃。又恨其  
貪污灌之以尿。後竟不死。觀此兩節。人尿實爲久  
傳効驗之方。今多因穢惡而忽之。惜哉。但人命至  
重。生死在於呼吸之間。有此極便極賤極效驗之  
藥。何不乘其昏絕不知而灌之。如灌之不入。急令  
人溺其頭面。使其入於七竅。未有不甦者也。

李時珍云。元史載布智兒從太祖征回回。身中數  
矢血流滿體。問仆即死。太祖命取一牛。剖其腹納

之牛腹中浸熱血中移時遂甦又云李庭從伯顏  
攻郢州砲傷左脇矢貫於胸幾絕伯顏命剖水牛  
納其中良久而甦何孟春曰予在職方時問各邊  
將無知此術者蓋不讀元史不知也特書此以備  
緩急

急救方小註云凡跌打繼溺至死而心頭熱者急  
用活鷄冠血滴入喉鼻之內男左女右男用公鷄  
女用母鷄刻下即甦又跌打氣絕用仙人柴即九  
里香葉搗自然汁一杯灌下即甦但心口有微熱

能受此藥無有不活名曰救命丹

### 眩暈

醫宗金鑑曰傷損之症頭目眩暈有因服剋伐之劑太過中氣受傷以致眩暈者有因亡血過多以致眩暈者如魚腹脹嘔吐宜用六君湯兼發熱作渴不思飲食宜用十全大補湯

耀山云血虛則陰虛陰虛則發熱而渴腹脹嘔吐必兼中氣太虛故用補治如此若撲打即時暈倒在地此氣逆血暈也按急救方補註用血管蔥毛

煨存性一錢老酒調服即醒又有真元不足不能攝氣歸元而暈者仍用補劑可也如失血過多而暈者用芎歸湯亦可

### 煩躁

醫宗金鑑曰傷損之證煩躁面赤口乾作渴脉洪大按之如無者宜用當歸補血湯如煩躁自汗頭暈宜用獨參湯如煩躁不寐者宜用加味歸脾湯如煩躁脇痛宜柴胡四物湯如亡血過多煩躁者宜用聖愈湯

東垣云發熱惡寒大渴不止其脉大而無力非白

虎湯症此血虛發躁也宜用當歸補血湯治裴先生云肌熱煩躁目赤面紅其脉洪大而虛此血虛也若誤服白虎湯輕則危重則斃

外臺秘要云陰盛發躁欲坐井中用附子四逆湯加葱白治之李東垣亦曰切忌寒涼之劑經曰陽症見陰脉者死陰症見陽脉者生外症煩躁而脉浮大重按若無此陰症也投治少差醫殺之耳

### 發喘

正體類要曰若出血過多面黑胸脹或胸膈痛而發喘



乃氣虛血乘于肺也急用二味參蘇飲若咳血衄血者  
乃氣逆血蘊于肺而發喘也急用十味參蘇飲加山梔  
黃芩蘇木

又云陰虛作喘者此血虛所致耳非瘀血爲患以  
四物湯加參芪五味麥門冬治之其喘頓止此症  
果係瘀血薰蒸於肺而喘只宜活血行氣亦不可  
下如前症面赤胸脹脇痛而喘當用人參一兩蘇  
木二兩作一劑水煎急服緩則不治產婦多有此  
疾

耀山云發喘之因果多在肺然按內經曰有所墮  
恐喘出於肝度水跌仆喘出於腎與骨是當分別

論治

作嘔

正體類要曰傷損作嘔若因痛甚或因尅伐而傷胃者  
宜四君子湯加當歸半夏生薑因忿怒而傷肝者用小  
柴胡湯加山梔茯苓因疫火盛者用二陳湯加姜炒黃  
連山梔因胃氣虛者用補中益氣湯加生薑半夏因出  
血過多者用六君子湯加當歸

準繩云瘀血在膈間阻礙氣道而反胃者以代抵當湯丸作芥子大取三錢去枕仰臥細細嚥之令其搜逐停積利下惡物將息自愈代抵當丸用錦紋大黃四兩芒硝一兩桃仁去皮尖六十枚當歸尾生地黃穿山甲蛤粉炒各一兩桂三錢或五錢共爲細末煉蜜爲丸用歸地者欲下血而不損血耳且引諸藥至血分也諸藥獷悍而欲以和劑之也如血老成積此藥攻之不動宜去歸地加廣茂醋浸透焙乾一兩肉桂七錢

又曰傷損嘔吐黑血者始因打撲傷損敗血流入胃腕色黑如豆汁從嘔吐而出也形氣實者用百合散形氣虛者加味芎歸湯

耀山云按薛氏以藥傷胃而嘔者脉必微細而遲乃涼藥尅伐而嘔也急用六君子湯加歸芍附子又有胃火作嘔者症必口渴唇揭係素有積熱復飲辛熱藥則火必更盛矣以清胃散加山梔黃芩甘草治之頓止如潰後作嘔仍按出血過多方法調治若投藥稍錯非徒無益而又害之

# 口渴

正體類要曰作渴若因出血過多用四物湯加參朮如不應用人參黃芪以補氣當歸熟地以養血若因潰後用八珍湯若胃熱傷津液用竹葉黃芪湯胃虛津液不足用補中益氣湯胃火熾盛用竹葉石膏湯若煩熱作渴小便淋瀝乃腎經虛熱非地黃丸不能救

東垣云發熱惡寒大渴不止其脉大而無力者非白虎湯症此血虛發躁而渴也宜用當歸補血湯不食

綱目治傷損不食按邵氏云凡打撲傷損三五日水飲不入口用生猪肉打爛溫水洗去血水打搗爛以陰陽湯和打以半錢用鷄毛送入咽內却以陰陽湯灌下之其食蟲聞香割開瘀血而上胸中自然開解此乃損血凝聚心間蟲食血飽他物蟲不來探故也謂之騙通法

鍾峻云江西一盜肋斷呻吟不食用生精猪肉四兩糯米飯一碗白糖四兩拌食越日而愈骨亦完好想亦秘方也愚按血閉嗜卧不食虛者用巴戟湯即四物加巴戟大黃補而行之實者承氣抵當

攻之如氣滯不食必須枳朮香砂以開之

### 秘結

醫宗金鑑曰傷損之證大便秘結若因大腸血虛火熾者用四物湯送潤腸丸或以猪胆汁導之若胃虛火燥者用六味地黃丸若腸胃氣虛者用補中益氣湯若大便秘結裡實氣壯腹痛堅硬者用玉燭散

耀山云按正體類要若胸腹脹痛大便不通喘咳吐血者瘀血停滯也用當歸導滯湯通之止腹作痛大便不通按之痛甚者瘀血在內也用加味承

氣湯下之。凡腹停瘀血，用大黃等藥，其血不下，反加胸膈脹痛，喘促短氣，用肉桂、木香、末各二錢，熱酒調服，即下惡血。此因寒藥凝滯不行，得辛溫而血自行耳。專用苦寒諸劑者，察之。

可法良規云：凡傷損之症，小便不利，若因出血，或平素陰虛火燥，而滲泄之，令不行者，宜滋膀胱之陰。若因疼痛，或平素肺經氣虛，不能生化腎水，而小便短小者，當補脾肺之氣，滋其化源，則小便自生。若誤用分利之劑，復損其陰，禍在反掌。經云：氣



化則小便出焉。又云無陽則陰無以生，無陰則陽無以化。亦有汗出不止而小便短小者，汗止便自利，尤忌分利滲泄之劑。

### 瘀滯

醫宗金鑑曰：傷損之證，腫痛者，乃瘀血凝結作痛也。若脹而重墜，色或青黑，甚則發熱作渴，汗出者，乃經絡壅滯，陰血受傷也。宜刺去惡血，以通壅塞，後用四物湯以調之。

可法良規云：凡傷損之症，若棍撲重者，患處雖不

破其肉則死矣。蓋內肉糜爛，與瘀血相和，如皮囊盛糊，然其輕者，瘀血必深蓄於內，急宜砭刺，即投大補之劑，否則大熱煩躁，頭目脹痛，牙關緊急，殊類破傷風症。此瘀穢內作而然也。急刺之，諸症悉退。

又云：若不砭刺，發泄爲患，匪輕。是不知傷重而內有瘀穢者也。須急去之，即服補益之劑，以固根本，庶保無虞。古人謂瘀穢惡於狼虎，毒於蛇蠍，去之稍緩，則戕性命，非虛言也。醫者三復之。

耀山云按薛氏醫按傷損腫痛不消有瘀血在內急宜砭之否則瘥後數年但遇天陰仍作痛也血屬陰從其類也

## 血虛

醫宗金鑑曰傷損之證血虛作痛者其症則發熱作渴煩悶頭暈日晡益甚此陰虛內熱之症宜八珍湯加丹皮麥冬五味子肉桂骨碎補治之

可法良規云凡傷損筋糜肉爛膿血大瀉陽亦隨陰而走元氣喪敗理勢必然氣血不虛者鮮矣智

者審之。

又云凡傷損之症遍身作癢或搔破如瘡疥此血不營於肌膚當作血虛治之不應兼補其氣亦有愈後身起白屑落而又起或有如布帛一層隔於肌膚乃氣血俱虛不能營于腠理宜大補氣血為主若作風邪治之誤矣。

又云凡傷損之症肢體麻木若口眼如常腰背如故而肢體麻木者氣虛也蓋血虛則氣虛故血虛之人肢體多麻木此是陰虛火動而變症實非風

也。當用升陽滋陰之劑。若作風治。凶在反掌。

又云。凡傷損之症。貴乎大補氣血。則腐肉易于潰爛。瘡口易于生肌。每見治者。不知氣血虧損。往往多用十宣散。又以方內參芪芎歸爲補益之劑。嫌其中滿。多用。不過錢許。以厚朴防已爲清毒之藥。因其行散動輒倍加。此何益於氣血。而欲責其速潰速斂。速生肌乎。無怪其煩躁作渴。飲食益少。因之不起者衆矣。

又云。凡傷損之症。不可輕服烏附等味。蓋其性味

辛熱恐助火以益其患其平素有失血及血虛之人雖在冬令決不宜用緣滯血得火而益傷陰血得火而益耗運血得火而妄行患肉得火而益壞若人平素虛寒或因病而陽氣脫陷者則用之不在此例

### 作痛

正體類要曰肌肉間作痛者營衛之氣滯也用復元通氣散筋骨作痛者肝腎之氣傷也用六味地黃丸內傷下血作痛者脾胃之氣虛也用補中益氣湯外傷出血

作痛者脾肺之氣虛也用八珍湯大凡下血不止脾胃之氣脫也吐瀉不食脾胃之氣敗也苟預爲調補脾胃則無此患矣

又云傷處作痛若痛至四五日不減或一二日方痛欲作膿也用托裡散若以指按不復起者膿已成也刺去膿痛自止也

可法良規云凡傷損之症多有患處作痛若出血過多而痛者血虛火盛也宜甘寒以降虛火甘溫以養脾氣若汗出多而痛者肝木火盛也宜辛涼

以清肝火甘寒以生肝血若筋骨傷而作痛者正而治之肌肉傷而作痛者調而補之氣血逆而作痛者順而補之氣血虛而作痛者溫而補之熱而痛者清之寒而痛者溫之陰虛火痛者用補陰之劑脾氣虛而痛者用補脾之劑作膿而痛者托之膿炊而痛者開之切不可驟用苦寒以致復傷脾胃也

筋攣

可法良規曰凡傷損之症膿血大潰血出太多兼之惡



寒發熱炊痛口乾肝血自然不足况肝主筋血去則筋無以養筋無血養則燥遂不能束骨而屈伸自如故有拘攣之象宜聖愈湯加柴胡木瓜山梔麥冬五味子治之如作風證治筋愈燥而血愈涸攣豈能伸乎

耀山云人生兩肘兩腋兩髀兩脰謂之八虛內經云凡此八虛者皆機關之室真氣之所過血絡之所遊邪氣惡血固不得住留住則傷經絡骨節機關不得屈伸故病攣也倘有一處脫臼出膠筋骨兩傷豈無惡血邪氣乘虛而入耶必須察其臟

腑利其關節調其氣血毋謂僅治其外而忽其內也又云肺心有邪其氣留于兩肘攷肺脉自胸行肘之俠白等穴心脉自腋行肘之少海等穴又云肝有邪其氣流于兩腋攷肝脉佈脇肋行腋下期門等穴又云脾有邪其氣留于兩髀髀者髀樞也攷脾脉上循陰股結于髀又云腎有邪其氣留于臕臕者膝後曲處也攷腎脉上膈出臕內廉此皆患生于裏而達于表如外傷既成內臟皆連知此八虛者用藥有所指歸矣陳藏器曰虛而勞者其

樊萬端宜應隨病增減如肺氣不足加天門冬麥  
門冬五味子心氣不足加上黨參茯神菖蒲肝氣  
不足加天麻川芎脾氣不足加白朮白芍益智腎  
氣不足加熟地黃遠志牡丹皮此又不可不知也  
按舒筋法治破傷後筋攣縮不能伸者用大竹管  
長尺餘兩頭各鑽一竅繫以繩掛于腰間一坐即  
舉足袞挫之勿計工程久當有效醫說載有人墜  
馬折脛筋攣縮不能行步遇一道人教以此法數  
日便愈如常又經驗全書云有人四肢無故節脫

但有皮連不能舉動名曰筋解用黃蘗酒浸一宿焙爲末酒下三錢多服方安

### 骨痛

醫宗金鑑曰傷損之症骨傷作痛乃傷之輕者也若傷重則骨或折或碎須用手法調治之其法已詳前篇若骨間微傷作痛肉色不變宜用葱熨法內服沒藥丸日間服地黃丸自愈矣

耀山云按內經曰久立傷骨又多食甘則骨痛而髮落又按薛氏云骨痛之證五更服和血定痛丸

日間用健脾胃生氣血之藥調理若腫痛發熱切不可服流氣等藥外用蔥熨法內服六君加黃芪柴胡桔梗續斷骨碎補之類或補中益氣湯加麥冬五味治之氣血和而熱自退矣救急方治渾身骨痛用破草鞋燒灰香油和貼痛處即止然外熨不若貼膏爲當雖骨痛至重亦能緩之

## 肝火

正體類要曰若骨入臼患處仍痛服藥不應肝脉洪大而急此肝火盛而作痛也用小柴胡湯加山梔黃連若

患處脹痛而兼發熱欲嘔兩脇熱脹肝脉洪大者此肝  
火之症也但令飲童便并小柴胡加山梔黃連歸稍紅  
花若肝脉浮而無力手按其腹反不脹者此血虛而肝  
脹也當以四物參苓青皮甘草之類治之若肝脉洪而  
有力胸脇脹痛按之亦痛者此怒氣傷肝之症也以小  
柴胡湯加芍歸青皮芍藥桔梗枳殼主之蓋此症不必  
論其受責之輕重問其患處去血之曾否但被人扭按  
甚重努力恚怒以傷其氣血瘀血歸肝多致前症甚則  
胸腹脹滿氣逆不通或血溢口鼻卒至不救

耀山云肝火作痛雖分虛實應與脇痛瘀滯二門  
叅看則頭頭是道矣

### 濕痰

正體類要曰若素有濕痰復傷墜墮遍身作痛發熱口  
乾脉大而滑此熱剋激動痰火爲患耳以清燥湯去人  
參當歸黃芪加黃芩山梔半夏黃柏治之若患處作痛  
胸間痰氣不利此濕痰爲患耳以枳殼青皮柴胡升麻  
木香茴香當歸川芎赤芍神麴紅花等藥或二陳加菴  
活桔梗蒼朮黃柏薑製生地當歸之類若濕痰肢節俱

痛下體益甚用二陳湯加南星羌活防風牛膝木朮蒼  
朮黃芩黃柏治之若血氣未充患處作痛而兼濕熱乘  
虛者用八珍湯加牛膝木朮蒼朮黃柏防己炙草以祛  
濕熱養陰血痛漸止

丹溪曰東南之人多因濕土生痰痰生熱熱生風  
證類中風惟宜清燥湯或二陳湯加減治之  
可法良規云凡傷損之症其患已愈而腿作痛乃  
受惠太重膿血過多瘡雖愈而肝經氣血尚未充  
也故濕熱乘之因虛而襲以致作痛非風證也故



用養血祛濕之劑以止痛又云腎水足則肝氣充  
溢經脉強健雖有傷損氣血不虧而潰飲以時氣  
路不至于上逆痰涎何由而上壅使腎氣一虛水  
不能生木則肝氣奔騰逆而不下痰氣亦隨之以  
升非風痰也乃水泛爲痰也宜六味地黄丸或六  
味地黄湯加清肝之劑

耀山云此症作痛分濕痰濕熱痰火痰氣四症總  
之痰因濕化濕居其多惟下部濕先受之故多用  
下部藥也

## 頭痛

正體類要曰傷損之症頭痛時作時止者氣血虛也若痛而兼眩屬疫也當生肝血補脾氣治之

可法良規云若頭目所傷作膿炊赤作痛膿出痛亦自止其或頭痛而時作時止者血虛而痛也非傷也若頭痛而兼眩者火也疫也氣虛也木旺也不可作寒治也

醫學入門云血虛頭痛自魚尾上攻而爲痛宜當歸補血湯加味四物湯眉尖後近髮際曰魚尾若

氣血俱虛頭痛宜用加味調中益氣湯或安神湯  
皆效

李東垣云瘦厥頭痛每發時兩頰青黃眩暈目不  
欲開懶于言語身體沉重兀兀欲吐此厥陰太陰  
合病也宜服局方玉壺丸及半夏白朮天麻湯

### 胸痛

正體類要曰傷損之症胸腹痛悶者多因跳躍捶胸悶  
挫舉重勞役恚怒而胸腹痛悶喜手摸者肝火傷脾也  
用四君子湯加柴胡山梔如畏手摸者肝經血滯也用  
傷科彙纂

四物湯加柴胡、山梔、桃仁、紅花。若胸脇作痛、內熱、晡熱者，肝經血傷也，用加味道遙散。若胸脇作痛、飲食少思者，肝脾氣傷也，用四君加芎歸、梔、柴、丹皮。若胸腹脹滿、飲食少思者，肝脾氣滯也，用六君加柴胡、芎歸。若胸腹不利、食少、無寐，脾氣鬱結也，用加味歸脾湯。若痰氣不利、脾肺氣滯也，用二陳湯加白朮、芎歸、梔子、青皮。若咬牙發搐，肝旺脾虛也，用小柴胡加川芎、山梔、天麻、鉤藤。若用風藥，則肝血益傷，肝火益甚，或糖泄，則腎水益虛，肝火愈熾。若用大黃等藥，內傷陰絡，反致下血。少壯者，

必爲痼疾老弱者多致不起

準繩云凡死血而有胃腕作痛者脉必澀作時飲湯水下或作呃者壯人用桃仁承氣湯弱人用歸尾川芎牡丹皮蘇木紅花玄胡索桃仁泥赤麴降香通草大麥芽穿山甲桂心之屬煎成入童便酒韭汁大劑飲之若挾死血而爲痞者多用牡丹皮紅麴炒麥芽製香附桔梗川通草穿山甲降香紅花山查肉蘇木各錢許酒童便各一鍾煎甚者加大黃臨服加韭汁桃仁泥按此凡大怒之後作痞

者皆可服又治死血而作腹痛者亦効

丹溪心法云心痛脉澁者有死血也又云作時飲湯水下作痛者有死血桃仁承氣湯下之又云如平日喜飲熱物以致死血留于胃口作痛桃仁承氣湯下之輕者韭汁苦薤開之

耀山云按丹溪所論乃瘀血在胃脘而作痛也傷損之症偶有血留胃脘故引此以備參考然手按仍痛總以脉澁爲據耳

醫林集要治血氣心痛用沒藥末二錢水一盞酒

一盞煎服

斗門方治血氣攻心不可忍者用蓼根洗剉浸酒飲

### 脇痛

正體類要曰脇肋脹痛若大便通和喘咳吐痰者肝火侮肺也用小柴胡湯加青皮山梔清之若胸腹脹痛大便不通喘咳吐痰者瘀血停滯也用當歸導滯湯通之內經曰肝藏血脾統血蓋肝屬木生火侮土肝火既熾肝血必傷脾氣必虛宜先清肝養血則瘀血不致凝滯

肌肉不致遍潰次壯脾健胃則瘀肉易潰新肉易生若行剋伐則虛者益虛滯者益滯禍不旋踵矣

丹溪心法云惡血停留于肝居于脇下而痛按之則痛益甚

可法良規云蓋打撲墜墮惡血宜凝不宜留況十二經絡之血生于心藏于肝統于脾小腹與脇皆肝經部位惡血蓄而不行必生脹滿疼痛自汗法當破血生血清厥陰肝經則善

醫學入門云瘀血必歸肝經脇腋痛或午後發者



小柴胡合四物湯加桃仁紅花乳香沒藥大便堅黑者桃仁承氣湯下之

選粹云跌撲脇痛血歸肝也破血消痛湯復元活血湯乳香神應散皆可參用

### 腹痛

正體類要曰肚腹作痛或大便不通按之痛甚者瘀血在內也用加味承氣湯下之既下而痛不止按之仍痛者瘀血未盡也用加味四物湯補而行之若腹痛按之不痛血氣傷也用四物湯加參芪白朮補而和之若下

而胸脇反痛、肝血傷也。用四君、芍、歸補之。既下而發熱、陰血傷也。用四物、參、朮補之。既下而惡寒、陽氣傷也。用十全大補湯補之。既下而惡寒發熱者、氣血俱傷也。用八珍湯補之。既下而欲嘔者、胃氣傷也。用六君當歸補之。既下而泄瀉者、脾腎傷也。用六君、肉、菓、破故紙補之。若下後手足俱冷、昏憤出汗、陽氣虛寒也。急用參附湯。吐瀉手足俱冷、指甲青者、脾腎虛寒之甚也。急用大劑參附湯。口噤、手撒、遺尿、痙盛、唇青、體冷者、虛極之壞症也。急投大劑參附湯、多有得生者。

丹溪心法云其痛有常處而不移動者是死血也如打撲墜墮而腹痛乃是瘀血宜桃仁承氣湯加當歸蘇木紅花入童便並酒煎服下之

證治準繩云瘀蓄死血而脹腹皮上見青紫筋小水反利脉亢濇先以桃仁承氣湯勢重者抵當湯虛人不可下者且以當歸活血散調治又云血積胸瘀桃仁地榆之類甚者蟲蟲水蛭又云失笑散治心腹痛甚効又方用劉寄奴六錢玄胡索四錢共爲末薑酒調服亦治腹痛皆通理氣血之劑也

集驗良方云、妊娠二三月至七八月、頓仆失跌、胎動不安、傷損腰腹痛、若有所見、及胎奔上搶心、短氣、下血不止、用乾地黄、當歸、艾葉、各二兩、阿膠、川芎、各三兩、水七升、煎取二升半、作三服飲之。

丹溪云、凡婦人因閃挫傷胎、腹疼血崩、用八珍湯去地黄、加陳皮、水煎、衝縮砂末炒黑、五靈脂末服。指迷方、治傷損胎動、下血腹痛、用阿膠、艾葉、秦艽、等分爲末、每服五錢、糯米百粒煎湯送服。小品方、無秦艽、皆効。又云、虛人用四物湯、加膠、艾、黃、芪、甘

草亦可。又竹茹酒亦治損胎腹痛。用青竹茹二合，好酒一升，煮三沸，三服即安。又方用苧麻根二兩，銀五兩，酒水各半煎服亦効。

產書云：胎動胎漏，皆能下血。胎動腹痛，胎漏腹不痛。胎動宜調氣，胎漏宜清熱。至於頓撲傷動胎氣，宜服膠艾安胎散。若孕婦三月前後，或經惱怒，或行走失足，跌損傷胎，腹痛腰脹，宜用安胎萬全神應散。

胎產心法云：妊娘凡遇傷仆觸忤，胎動不安，腹痛

腰痠下墜勢若難留者用佛手散胎未損服之即安已損服之可下醫者當細心詳審圓機活法以施治庶可保全八九

醫學入門云瘀血腹痛常有處或跌撲損傷或婦人經來及產後惡瘀未盡下而凝滯用四物去地黃加桃仁大黃紅花治之又血痛宜失笑散調之耀山云按傷損瘀滯腹痛非用下法不可然既下之後變生多症此薛氏之論所以詳且確也至于孕婦腹痛非安胎不可學者更宜潛心也

# 腰痛

醫宗金鑑曰傷損腰痛脊痛之證或因墜墮或因打撲瘀血留於太陽經中所致宜地龍散治之

薛氏云腰爲腎之府雖曰閃傷寔有腎經虛弱所致用杜仲補骨脂五味子山茱萸蓉山藥治之

許氏寶鑑云舉重勞傷或挫閃墜落以作痛亦謂之腎腰痛宜獨活湯乳香起痛散如神散舒筋散立安散愚按紫虛脉訣云腰痛之脈多沉而弦沉實閃肭又直指云血滯則腰痛轉側如錐之所刺

瘀血者宜破血散瘀湯瘀在足太陽少陰少陽者  
川芎肉桂湯瘀在腰脊者地龍散寔者桃仁承氣  
湯久者四物湯加桃仁蘇木酒紅花治之

### 陰痛

正體類要曰小腹引陰莖作痛小便如淋時出白津此  
肝經鬱火也宜用小柴胡湯加大黃黃連山梔服之待  
痛定再用養血藥調治夫小腹引陰莖作痛之症往往  
誤認爲寒症投以熱劑則諸竅出血或二便不通以及  
危殆輕亦損其目矣



正傳脉法云肝脉沉之而急浮之亦然若脇下痛有氣支滿引小腹而痛時小便難若目眩頭痛腰脊痛得之少時有所墜墮也

### 青腫

正體類要曰青腫不消者用補中益氣湯以補氣腫點不消者用加味道遙散以散血若炊腫脹痛者瘀血作膿也用八珍湯加白芷托之若膿潰而反痛者氣血虛也用十全大補湯補之若骨膠接而復脫者肝腎虛也用地黃丸如腫不消青不退者氣血虛也內用八珍湯

外用葱熨法則瘀血自散腫痛自消若行氣破血脾胃愈虛運氣愈滯若敷貼寒藥則瘀血益凝內腐益深致難收拾

經曰氣主噓之血主濡之若傷損壅腫不退色黯不消元氣虛也當以六君子湯加芎歸培養脾胃元氣則青腫自消瘀滯自行膿穢自出苟服剋伐涼劑虛其氣血益腫益青益潰矣

經曰壯者氣行則愈怯者則著而爲病若骨已接血已入其腫不消者此元氣怯弱也怯弱所以不

能運散瘀滯也。惟補益滋陰助陽，則運氣健旺，瘀血自散，腫痛自消。若投行氣破血之劑，則元氣愈怯，運氣愈滯，患在骨髓及血氣罕到之處，最難調治。

啟玄方治打的青腫過腿面者，用鮮三七梗葉搗爛，敷在青處，瘀血即消，如神。如無三七，即白蘿蔔搗敷亦效。

傷損臂白脫出腫痛，得效方用生地搗爛，攤油紙上次，次糝木香末一層，又攤地黃於上，貼患處，明日

痛即止。

傷損愈後肌膚青腫用茄子種極大者切一指厚放瓦上焙乾爲末酒調二錢臨卧服一夜消盡無痕此聖惠方也。

馮魯瞻曰凡跌撲損傷蹶折閃挫雖由外觸勢必內傷氣血凝滯紅腫或青痛不可忍故始須用甘辛溫散行氣破瘀則痛自退腫自消如獨活白芷荆介防風川芎當歸沒藥古文錢鹿角灰赤芍紅花之類以水酒煎服冲入童便尤妙及外傷平復

猶宜滋補氣血筋骨之藥調之

耀山云都中聞一司員偶因醉後跌傷頭面紫赤青腫碍見堂官有人傳其一方用熱開水浸布手巾乘熱罨傷處不計次數冷則易之青腫漸漸消散次日就可上堂按此即延壽方治金瘡血出不止之意也

### 難潰

薛氏曰腐肉難潰或惡寒而不潰用補中益氣湯或發熱而不潰用八珍湯若因尅伐而不潰者用六君子湯

加當歸其外皮黑堅硬不潰者內火蒸炙也內服八珍湯外塗當歸膏其死肉不能潰新肉不能生而致死者皆失于不預補脾胃也

可法良規云大抵脾胃主肌肉腐潰生肌全在脾胃氣血兩旺倘治者不識病機失於補助故有死肉不能潰而死者有死肉已潰新肉不能生而死者有死肉潰新肉生瘡口久不能斂而死者此三者皆失于不預爲補益耳

不斂

正體類要曰：新肉不生，若患處夭白，脾氣虛也；用六君子歸脾湯。處緋紅，陰血虛也；用四物參朮。若惡寒發熱，氣血虛也；用十全大補湯。膿稀白而不生者，脾肺氣虛也；用補中益氣湯。膿稀赤而不生者，心脾血虛也；用東垣聖愈湯。寒熱而不生者，肝火動也；用加味逍遙散。晡熱而不生者，肝血虛也；用八珍牡丹皮。食少體倦而不生者，脾胃氣虛也；用六君子湯。膿穢而不生者，陰虛邪火也；用六味地黃丸。四肢困倦，精神短少而不生者，元氣內傷也；用補中益氣湯。如夏月調中益氣湯，作瀉用清

暑益氣湯秋令作瀉用清燥湯

可法良規云大抵傷損症候內無瘀血即當補脾脾氣得補則肉傷者自愈肉死者自潰新肉易生瘡口易合故云脾健則肉自生切不可偏用寒涼剋伐之劑復傷元氣致不能生肌收斂雖行補益緩不濟事矣

耀山云若誤服行氣之藥而胸痞氣促食少體倦患處色黯膿清者用六君子湯加桔梗若誤服下血之藥而瀉患處色黯者用十全大補倍加肉桂



麥冬五味子若誤敷寒涼之藥反致患處腫痛胸  
腹痞悶者內服六君加木香當歸外敷回陽膏若  
患處瘀血誤不砭去深蓄煩熱者急宜砭出瘀血  
若骨斷筋連急不剪去侵及好肉者則不治若誤  
感風邪患處瘙痒者用祛風消毒之劑或腐而不  
痛黑而不脫者當大補元氣庶可保生此又治傷  
家腫潰之法也

### 破傷風

正體類要曰損傷破後傷風之症按河間云風症善行

數變入臟甚速死生在反掌之間宜急分表裏虛實而治之邪在表者則筋脉拘急時或寒熱筋惕搐搦脉浮弦用羌活防風湯散之在半表半裏者則頭有微汗身無汗用羌活湯和之傳入裏者舌強口噤項背反張筋惕搐搦痰涎壅盛胸腹滿悶便溺閉赤時或汗出脉洪數而弦以芎黃湯導之既下而汗出表虛也以白朮防風湯補之不時灌以粥飲爲善前症乃氣虛未損之治法也若膿大泄陽隨陰散氣血俱虛而類前症者悉宜大補脾胃切忌祛風之藥

醫宗金鑑曰。破傷風證有四。因動受靜。受驚受瘡。潰後受動。而受者。怒則氣上。其人跳躍。皮肉觸破。雖被風傷。風入在表。因氣血鼓旺。不致深入。屬輕靜而受者。安則起居和平。氣不充鼓。偶被破傷。風邪易於入裏。屬重驚而受者。驚則氣陷。偶被傷破。風邪隨氣直陷入陰。多致不救。屬逆如邪在表者。宜服千里散。或雄鼠散。汗之。次以星風散。頻服。追盡臭汗。如邪在裏者。宜江鯽丸下之。如邪在半表半裏無汗者。宜羌麻湯主之。若頭汗多出而身無

汗者不可發汗宜榆丁散和之如邪傳入陰經者則身涼自汗傷處平塌陷縮甚則神昏不語噤口舌短貴乎早治至於生瘡潰後受風者因瘡口未合失於調護風邪乘虛而入先從瘡之四圍起粟作癢重則牙緊項軟下視當以八珍養榮等湯加殭蠶補之先固根本風邪自定按劉完素只論三陽汗下和三法而不論三陰者蓋風邪傳入陰經其證已危如腹滿自利口燥咽乾舌捲囊縮等類皆無可生之理故置而不論也

朱丹溪曰破傷風證多死最急證也始因出血過多或風從瘡口而入或瘡早閉合瘀血停滯于內血受病而屬陰始雖在表隨易傳藏故此風所傷必多難治其證身熱自汗口噤搐搦勢急非常藥可治非全蠟不開煎以防風風藥

李東垣曰破傷中風脉浮在表汗之脉沉在裏下之背搐羗活防風前搐升麻白芷兩傍搐者柴胡防風右搐者加白芷

陳實功曰破傷風因皮肉損破復被外風襲入經

絡漸傳入裡其患寒熱交作口噤咬牙角弓反張  
口吐涎沫入陰則身涼自汗傷處反爲平陷如故  
其毒內收矣當用發汗之劑令風邪外出如汗出  
後口噤不開語聲不出諸症不退傷處不高漸醒  
漸昏時發時止者死

準蠅治破傷風諸藥不效事在危急煎治猪癰羊  
癰等風發之昏倒不知人事者用鰾鰓切斷微炒  
杭粉焙黃皂礬炒紅色各一兩硃砂另研水飛三  
錢上三味研和勻入硃砂再研每用二錢無灰酒

誤投風藥以致不起者多矣。若果是破傷風證，亦係元氣耗損，外邪乘虛而致，皆宜峻補，先固其本，爲善倘安投風藥，禍如反掌。治者不可不察。

耀山云：瘕者，筋勁強直而不柔和也。瘕病者，口噤角弓反張是也。瘕與瘕通，稱破傷風。正傳云：破傷風者，初因擊破皮肉，視爲尋常，殊不知風邪乘虛而襲，變爲惡候。其症寒熱間作，甚則口噤目邪，身體強直如角弓反張之狀，死在旦夕。回春云：瘕病者是難治也。有跌磕打傷，瘡口未合，貫風者亦成。

瘧此名破傷風也。脉浮而無力，太陽也；長而有力，陽明也；浮而弦小，少陽也。綱目云：初覺瘡腫起，白痴身寒熱，急用玉真散薑汁和酒調服，以滓敷瘡口上。若口噤，用童便調服。河間云：背後搐者，太陽也；身前搐者，陽明也；兩旁搐者，少陽也。又曰：太陽宜汗，陽明宜下，少陽宜和。若明此三法而不中病者，未之有也。又曰：在表則以辛熱發散之，宜防風湯；羌活防風湯；在半表半裏以辛涼和解之，宜羌活湯；在裏則以寒藥下之，宜小芎黃湯、大芎黃湯。



其外敷仍用葱熨法神效此家傳秘授經效之方也

### 論攻利

儒門事親云病生之因其有四焉有不因氣動而病生於外者以爲墜墮斫射剝割撞撲落馬墮井打撲悶胸損折湯沃火燒蟲蛇螫毒之類四因之一也有獨治內而愈者有兼治內而愈者有獨治外而愈者有兼治外而愈者有先治內後治外而愈者有先治外後治內而愈者有須解毒而攻擊者有須無毒而調引者方法所

施或重或輕或緩或急或收或散或潤或燥或軟或堅  
方士之用見解不同各擅己心好丹非素故復問之

凡落馬墜井因而打撲便生心恙是痰涎散於上  
也宜三聖散空心吐之如本人虛弱瘦瘁可用獨  
聖散吐之後服安魄之藥如定志丸之類牛黃人  
參朱砂之屬

凡跌打損傷車碾杖瘡腫發焮痛可用禹功散通  
經散神祐丸導水丸等藥峻瀉一二十行則痛止  
當痒痛屬夏痒屬秋秋出則夏衰矣蓋此痛得之

於外非其先元虛弱古人云痛隨利減病去如掃  
此法得之睢陽高大明侯德和使外傷者不致癰  
殘跛臂之患

凡一切刀器所傷有刀箭藥用風化石灰一斤龍  
骨四兩二味爲細末先於端四日採下刺薊菜於  
端午日五更合杵臼內搗和爲團作餅子若酒麴  
中心穿眼懸於背陰處陰乾搗羅爲末於瘡口上  
搽貼大效內經云先治外而後治內是也

凡一切蟲獸所傷及杖瘡焮發或透入裏者可服

木香檳榔丸七八十丸或百餘丸生薑湯下五七  
行量虛實加減用之又犬咬蛇傷不可便貼膏藥  
生肌散之類先當用導水丸禹功散之類可瀉毒  
氣或瀉十餘行即時痛減腫消然後可用膏藥及  
生肌散之類敷之內經云先治內而後治外是也  
耀山云按張氏專用大攻大利薛氏專用大溫大  
補何二公用藥相反如此有言南方宜補北方宜  
攻李仕材又引內經微四失論言富貴人宜補貧  
賤人宜攻故二公之收效若一耶然而讀張氏之

論亦有調引之法而薛氏之方未嘗無攻利之劑也是以僅錄張氏之法而原方繁多不錄

### 辨生死

醫宗金鑑曰十不治症一顛撲損傷入于肺者一肩內耳後傷透于內者一左腋下傷透于內者一膈傷斷者一小腹下傷內者一傷破陰子者一老人左股壓碎者一症候繁多者一血出盡者一脈不實重者

可法良規云若元氣虛怯邪氣滋盛潰爛延上必死不潰而色黯者亦死手足心背受病色黑者多

死手足節解損去者不死故傷損骨斷筋皮尚連者急剪去之若肉被傷欲去尚連者亦剪之不爾潰及好肉怯弱之人多致不救如手足與指損去一節不死可治惟去其半節留其半節或骨斷筋皮相連者最爲難治

陳氏決疑秘法云頂門破而骨未入內者可治骨陷入者不治腦骨傷損在硬處者可治若在太陽穴及骨縫軟處不可治頭骨陷入內未甚者可治顙門出者死兩目俱傷者可治鼻骨山根傷者可

治斷者死耳後受傷入內者不治氣出不收眼開者不治閉者可治氣管傷者死食管全斷者不治未全斷者可治男人兩乳受傷急救可治女人兩乳傷重者必爛不治胸膈紅腫青色未裏心者可治紅既裏心者不治胸腹受傷出黃水黑水血者十不治一若正心口青色者七日死調醫三日後轉黃色者可救不轉者必死食飽受傷三日不死者可救兩脇有傷血入五臟者難治腸出不臭者可治臭者死腸未斷者可治斷者不治腸出色紫

黑者不治。色不變者急治可愈。夾脊斷者不治。腰  
歪傷重而自笑者不治。傷輕雖笑可治。小腹受傷  
吐尿。眼直視者不治。傷輕眼未直視。雖吐尿無害  
也可治。孕婦小腹受傷。犯胎者不治。孕婦腰傷。其  
胎必下。不可救。小肚受傷。不分男女。皆不治。陰囊  
有子可救。若腎子受傷。入小腹者不治。陰囊破開。  
腎子懸繫者可治。若腎子傷碎者不治。尾間骨斷  
者不治。兩手受傷。脉骨斷者不治。兩足腿骨斷者  
難治。脉大而緩。即四至亦不治。魚際骨有脉者可



救諸骨受鐵器傷五日外流黃水通內者不治如  
跌撲及破傷風頭自青黑額汗不流眼小目瞪身  
汗如油謂之四逆均屬不治

按趙除瑛秘本有驗症五法可取以爲初學之津  
梁故附于末一看兩眼眼白有血筋腹內必有瘀  
血筋多瘀多筋少瘀少兩眼活動有神易治兩眼  
無神難治二看指甲以我指拏其指甲放指即還  
原血色者易治少頃後還原者難治紫黑色者不  
治三看陽物不縮可治縮者不治四看腳趾甲紅

活者易治。色黃者難治。看與指甲同。五看腳底紅。活者易治。色黃者難治。

金鑑云。凡傷天髑穴。與眉角腦後。臂裏跳脉。髀內陰股兩乳上下。心下鳩尾及五臟六腑之俞者。皆死。腦後出髓而不能語。目睛直視。喉中沸聲。口急。唾出。兩手妄舉者亦死。

訣曰

金傷諸損。眼暈青。定主身亡。難救命。若見氣喘與呃塞。且看一七內中應。

耀山云商輅曰醫者意也如對敵之將操舟之工貴乎  
臨機應變何必拘泥其成案也復思案者驗也又如符  
之合璧桴之應鼓信斯十療十全故而又謂之治驗也  
古人以經驗之方治對證之病記其功效立爲案驗俾  
使後學可以遵循固守以爲範則耳然讀薛氏醫案溫  
補居多儒門事親攻利爲先而法雖兩岐其取効若一  
何也此皆因地視人機靈法活所以術並青囊能甦白  
骨者也茲集各家醫案方法俱備善學者得醫之意用  
已驗之方人人可臻壽域矣

不出血  
不止張地官陸馬傷腿服草烏等藥致衄血欬嗽臂痛

目黃口渴齒痛小便短少此因燥劑傷肺與大腸  
而致薛用生地芩連黃蘗知母山梔山藥甘草以  
潤肺之燥而生腎水小便頓長諸證並止以山藥  
五味麥門參芪芎歸黃蘗黃芩知母炙草以滋陰  
血養元氣而瘡飲

俞進士折腿骨已接三月尚發熱出血不止正體  
醫治不應左關脉洪數此肝火熾甚血得熱而妄  
行也遂投小柴胡湯加梔子芍藥生地防風血止

熱退又用八珍麥冬五味治之瘡口即愈

田宗伯姪仲秋因怒跌撲偏身作痛發熱衄血肝脉弦洪薛曰久衄脉弦洪乃肝火盛而制金也至春則肝木茂盛而自焚或戕賊脾土非易治之證當滋腎水以生肝木益脾土以生肺金乃雜用瀉肝火等藥殘於仲春之月

大尹劉國信金瘡出血發熱煩躁屬陰虛爲患用聖愈湯治之虛火息而血歸經矣

梁閣老姪金瘡腫痛出血不止寒熱口乾此氣虛

血無所附而不歸經也用補中益氣五味麥門主之陽氣復而愈

瘀血注

一患者瘀血流注腰脅兩足俱黑隨飲童便酒砭出瘀血糜肉投以小柴胡湯去半夏加山梔連芩骨碎補以清肝火用八珍茯苓以壯脾胃死肉潰而新肉生後瘡復潰得靜調治年餘而痊

一患者瘀血攻注陰囊潰而成漏膿水清稀所服皆寒涼之劑診其肝脉短澀餘脉浮而無力此肝木受肺金剋制又元氣虛不能收斂遂用壯脾胃

寒藥  
之非

生氣血之方元氣少復後終歿於金旺之日

一患者腫痛敷寒涼之藥欲內消瘀血反致臀腿  
俱冷瘀血併胸腹痞悶薛急去所敷之藥以熱童  
便酒洗患處服六君木香當歸敷回陽膏臀腿漸  
溫又以前藥去木香加川芎藿香肉桂四劑瘀血  
解乃刺之更以壯脾胃養氣血得痊

雲間曹子容爲室人中風灌藥誤咬去指半節焮  
痛寒熱外敷大黃等藥內服清熱敗毒患處不痛  
不潰膿清寒熱愈甚薛曰此因涼藥遏絕隧道而

然也。遂敷玉龍膏以散寒氣。更服六君子湯以壯脾胃。數日後患處微痛。腫處漸消。此陽氣運達患處也。果出稠膿。不數日半指潰脫。更服托裏藥而飲。

上舍王天爵傷足。炊腫內熱作渴。外敷內服皆寒涼敗毒。患處益腫而不潰。且惡寒少食欲作嘔吐。薛曰。此氣血俱虛。又因寒藥凝結隧道。損傷胃氣。以致前證耳。遂用香砂六君子。芎歸炮薑外證悉退。惟體倦。晡熱。飲食不甘。以補中益氣湯加地骨



皮五味麥冬治之而愈

州守王廷川傷指即用帛裹之瘀血內潰焮腫至手薛謂宜解患處以出瘀血更用推陳致新之劑不信乃敷涼藥痛雖少止次日復作又敷之數日後手心背俱潰出瘀穢膿水尚服敗毒之劑氣血益虛色黯膿清飲食少思仍請予治投以壯脾胃生氣血之劑由是膿水漸稠而愈

不從

一患者發熱煩躁用四物黃芩紅花軟柴山梔花粉煩熱已清瘀血深蓄欲針出之不從忽牙關緊

發熱

急患處作痛始砭去膿血即安用托裏養血新肉  
漸長忽患處瘙癢此風熱也用祛風消毒之劑而  
痊

楊進士傷手指焮痛發熱服寒涼之藥致飲食頓  
減患處不潰薛用托裏養血之藥食進瘡潰後因  
勞每日晡發熱此陰虛而內熱也以四物軟柴胡  
地骨皮乃退更用養血氣之藥而瘡斂

一男子墜馬腹有瘀血服藥下之致發熱盜汗自  
汗脉浮濇薛以爲重劑過傷氣血所致投以十全

大補湯益甚。或譖語此藥力未及而然也。以前藥加炮附子五分服之。即睡覺來頓安。再劑而痊。舉人余時正金瘡。燉痛出血不止。惡寒發熱。用敗毒等藥愈甚。此亡血過多。氣無所附而然耳。遂以四物黃蘗知母軟柴胡玄參五味麥門治之。即愈。一女子年十七。閃右臂微腫作痛。寅申時發熱。薛決其膽經血虛火盛。經水果先期而至。先以四物合小柴胡湯。四劑熱退。更以加味四物湯加香附地骨皮山梔各五分。二十餘劑。其腫亦消。乃去黃

連山梔又五十餘劑經水調而元氣充矣

昏憤

一婦人孟冬傷足亡血頭汗內熱作渴短氣煩躁不時昏憤其脉洪大按之微弱此陰血虛於下孤陽炎於上故發厥而頭出汗也以四物合小柴胡湯一劑汗即止以四物去川芎加參芪麥門五味炙草少用肉桂四劑諸證悉去又三十餘劑血氣復而愈

一男子孟夏折腿出血過多其初眩暈眼花後則昏憤此陰血傷損陽火熾甚制金不能平木木旺

生風所致急灌童便更用人參當歸各五錢荊芥  
川芎柴胡芍藥白朮各二錢山梔黃蘗黃芩桔梗  
各一錢甘草五分服之隨爽又用四物參芪各五  
錢生地柴胡各一錢四劑煩躁悉去

眩暈

一患者腹脹嘔吐眩暈用柴胡黃芩山梔紫蘇杏  
仁枳殼桔梗川芎當歸赤芍紅花桃仁四劑而定  
後又因出血過多昏憤目黑用十全大補等藥而  
蘇時肌肉潰爛膿水淋漓筋攣骨痛薛切其脉浮  
而濡沉而弱此因氣血耗損不能養筋筋虛不能

束骨遂用養氣血之藥治之而愈

一患者杖瘡愈後失於調理頭目不清服祛風化痰等藥反眩暈服牛黃清心丸又肚腹疼痛杖瘡腫痒發熱作渴飲食不思痰氣上升以爲杖瘡餘毒復作診左尺脉洪大按之如無薛曰此腎經不足不能攝氣歸原遂用人參黃芪茯苓陳皮當歸川芎熟地山藥山茱萸五味麥門灸草服之而尋愈後因勞熱渴頭痛倦怠少食用補中益氣湯加麥門五味而愈

一患者兩脇脹悶欲欬不欬口覺血腥徧身臂腿  
脹痛倦怠不食煩渴脉大此血脫煩躁也與童便  
酒及砒患處出死血糜肉甚多忽發熱煩躁汗出  
投以獨參湯三劑少止又用補氣血清肝火之藥  
數劑飲食稍進後用獨參湯間服諸證悉退飲食  
頓加但不多寐以歸脾湯加山梔竹茹四劑而熟  
睡因勞心遂煩渴自汗脉大無力以當歸補血湯  
二劑而安又以十全大補去川芎加麥門五味牡  
丹地骨麻黃根浮麥數劑而汗止死肉且潰又二

十餘劑而新肉生

一患者煩躁面赤口乾作渴脉洪大按之如無薛  
曰此血虛發躁也遂以當歸補血湯二劑即止後  
日晡發熱更以四物加柴胡牡丹地骨黃蘗知母  
治之熱退而瘡斂

一患者頭額出汗熱渴氣短煩躁骨痛瘀肉不潰  
遂割去之出鮮血服芩連之藥益甚其脉洪大而  
微此氣血俱虛邪火熾盛所致以四物參芪朮炙  
草少用柴胡炒芩二劑頭汗頓止又加麥門五味



肉桂二劑諸證悉退後用參芪歸朮炒芍藥熟地  
麥門五味十餘劑瘀血潰而膿水稠矣但新肉不  
生以前藥倍用白朮而飲

吳給事陸馬傷首出血過多發熱煩躁肉瞤筋惕  
或欲投破傷風藥予曰此血虛火動所致當峻補  
其血爲善遂用聖愈湯二劑即安又養氣血而瘡  
歛

張進士季秋陸馬亡血過多出汗煩躁翌日其汗  
自止熱躁益甚口噤手顫此陰血虛陽火乘之而

汗出爲寒氣收斂腠理故汗不得出火不得泄怫鬱內甚而益增他證也予用四物加柴胡黃芩山梔四劑少止又用四物參芪軟柴胡五味麥門治之而痊

發喘

舉人杜克弘陸馬服下血藥反作喘日晡益甚此血虛所致耳非瘀血爲患遂以四物加參芪五味麥門治之其喘頓止又用補中益氣加五味麥門而愈

作嘔

一患者痛甚發熱嘔吐少食胸膈痞滿用行氣破

血之劑益甚口乾作渴大便不調患處色黯薛曰  
此痛傷胃氣所致遂以四君當歸炒苓軟柴藿香  
二劑諸證漸愈又用大補之劑漬之而瘳

一患者發熱熾痛服寒涼藥更加口乾作渴肚腹  
亦痛自以爲瘀血欲下之薛按其肚腹不痛脉微  
細而遲飲食惡寒此涼藥傷胃而然也急用六君  
加芍藥當歸炮附子各一錢服之前證益甚反加  
譫語面赤薛意其藥力未至耳前藥再加附子五  
分服之即睡覺未諸病頓退而安

一膏梁之人跌腿青腫作痛服辛熱之藥反發熱作嘔患處益痛口乾脣揭薛曰膏梁之人內多積熱更服辛熱之劑益其胃火而使然也頻飲童便以清胃散加山梔黃芩甘草治之頓止患處以葱熨之腫即消散

一婦人傷指手背俱腫微嘔少食彼以爲毒氣內攻診其脉沉細此痛傷胃氣所致也遂刺出膿碗許先以六君霍香當歸而食進繼以八珍黃芪白芷桔梗月餘而瘡愈

一中年人中脘作痛食已則吐面紫霜色兩關脉  
濡知其血病也問之乃云跌撲後中脘即痛投以  
生新推陳血劑吐出停血碗許則痛不作而食亦  
不出矣

作渴一患者瘀血雖去飲食形色如故但熱渴熾痛膈

痞有痰以小柴胡湯加天花粉貝母桔梗山梔二  
劑少愈又加生地歸尾黃芩柴胡山梔花粉而愈  
薛曰予治百餘人其杖後不虛者惟此一人耳

瘀血一患者腫痛發熱作渴汗出薛曰此陰血受傷也

先砭去惡穢以通壅塞後用四物柴胡黃芩山梔  
丹皮骨碎補以清肝火而愈

一患者傷處揉散惟腫痛不消薛曰此瘀血在內  
宜急砭之不從薛以蘿蔔自然汁調山梔末敷之  
破處以當歸膏貼之更服活血之劑而瘥數年之  
後但遇陰天仍作痒痛始知不砭之失

一患者臀腿黑腫而皮不破但脹痛重墜皆以爲  
內無瘀血惟敷涼藥可以止痛薛診其尺脉濡而  
結此因體肥肉厚瘀血深蓄刺去即愈否則內潰

有爛筋傷骨之患，薛入針四寸，漂黑血數升，腫痛遂止。是日發熱惡寒，煩渴頭痛，此氣血俱虛而然也。以十全大補之劑遂痊。

一男子閃傷右腿，壅腫作痛。薛謂急砭去滯血，以補元氣，庶無後患。不信，乃外敷大黃等藥，內服流氣飲，湧出穢膿數碗許，其膿不止，乃復請治。視其腿細而脈大作，渴發熱，薛不治，後果歿。

憲友王汝道環跳穴處閃傷瘀血腫痛，發熱作渴，遂砭去瘀血，知其下焦素有虛火，用八珍加黃藥。

知母牛膝骨碎補四劑頓止用十全大補湯少加黃蘗知母麥門五味三十餘劑而效

血虛作痛

一婦人磕臂出血骨痛熱渴煩悶頭暈日晡益甚此陰虛內熱之證用八珍加丹皮麥門五味骨碎補肉桂及地黃丸治之悉愈却去桂加牛膝續斷二十餘劑而瘡斂

一患者愈後腿作痛薛意膿血過多瘡雖愈肝經血氣未充實而濕熱乘虛也遂以八珍湯加牛膝木瓜黃蘗防己炙甘草以祛濕熱養陰血痛漸止



瘡口  
痛

乃去黃藥防已服之遂瘳

一患者患處脹痛悲哀忿怒此厥陰之火爲七情  
激而然耳遂砭去瘀血以小柴胡湯加山梔黃連  
桔梗而安後用生肝血養脾氣之藥瘡潰而歛  
戴給事墜馬腿腫痛而色黯食少倦怠此元氣虛  
弱不能運散瘀血而然耳遂用補中益氣去升麻  
柴胡加木瓜茯苓芍藥白朮治之而痊

陽氣  
脫陷

梁閣老姪跌傷腿外敷大黃等藥內服破血之劑  
遂致內潰針出膿三碗許虛證悉具用大補之劑

兩月餘少能步履後因勞心手撒眼閉汗出如水欲用祛風之劑薛曰此氣血尚未充足而然也急以艾炒熱頻熨肚臍并氣海穴處以人參四兩炮附子五錢煎灌良久臂少動又灌一劑眼開能言但氣不能接續乃以參芪歸朮四味共一斤附子五錢水煎徐徐服之元氣漸復飲食已進乃去附子服之而瘡愈

不補  
之非

一患者臂腿脹痛發熱煩躁刺去死血脹痛少寬熱躁愈甚此血脫邪火旺而然也急用獨參湯補

骨傷  
作痛

之少愈。又以健脾胃養氣血藥治之。腐肉漸潰。遂愈。大抵此證宜預調補。以顧收斂。切不可伐其氣血。不行補益。以致不能收斂矣。

一小兒足傷作痛。肉色不變。傷在骨也。頻用炒葱熨之。五更用和血定痛丸。日間用健脾胃生氣血之劑。數日後服地黃丸。三月餘而瘥。

一小兒臂骨出臼。接入腫痛發熱。服流氣藥益甚。飲食少思。薛以葱熨之。其痛即止。以六君黃芪柴胡桔梗續斷骨碎補治之。飲食進而腫痛消。又用

補中益氣加麥門五味治之氣血和而熱退愈矣

肝火作痛

楊司天骨已入臼患處仍痛服藥不應肝脉洪大

而急薛曰此肝火盛而作痛也用小柴胡湯加梔

連二劑而痛止用四物山梔黃蘗知母調理而康

一患者瘀血內脹焮痛發熱口乾作渴飲食不甘

四肢倦怠薛曰此肝火熾盛脾土受制故患前證

喜其稟實年壯第用降火清肝活血之劑而愈

一患者患處脹痛發熱欲嘔兩脇熱脹肝脉洪大  
薛曰肝火之證也但令飲童便并小柴胡湯加黃

連山梔歸稍紅花諸證果退

濕痰  
作痛

大宗伯沈立齋孟冬閃腰作痛胸間痰氣不利以  
枳殼青皮柴胡升麻木香茴香當歸川芎赤芍神  
麴紅花四劑而瘥但飲食不甘微有潮熱以參芪  
白朮陳皮白芍各一錢川芎八分軟柴胡地骨皮  
炙甘草各五分十餘劑而康

劉尚賓體肥臂閃作痛服透骨丹反致肢節俱痛  
下體益甚以二陳南星羌活防風牛膝木瓜蒼朮  
黃芩黃蘗治之身痛遂安以前藥加歸尾赤芍桔

梗治之而痊

鄭吏部素有濕痰孟冬墜馬服辛熱破血之藥偏身作痛發熱口乾脉大而滑此熱剗激動痰火爲患耳治以清燥湯去人參當歸黃芪加黃芩山梔半夏黃蘗熱痛頓去患處少愈更用二陳羌活桔梗蒼朮黃蘗薑製生地當歸遂痊

脇肋  
脹痛

一患者愈後口苦腰脇脹痛服補腎行氣等藥不愈薛按其肝脉浮而無力此屬肝胆氣血虛而然耳用參芪芎歸地黃白朮麥門五味治之而愈

腹內  
作痛

李進士季夏傷手出血不止發熱作渴兩脇作脹  
按之即止此血虛也用八珍加軟柴胡天花粉治  
之頓愈更用養氣血之藥調理而痊

一患者杖後服四物紅花桃仁大黃等劑以逐瘀  
血腹反痛更服一劑痛益甚按其腹不痛薛曰此  
血虛也故喜按而不痛宜溫補之劑遂以歸身白  
朮參芪炙草二劑痛即止

一患者仲秋夜歸墜馬腹內作痛飲酒數杯翌早  
大便自下瘀血即安此元氣充實挾酒勢而行散

一男子跌傷腹痛作渴食梨子兩枚益甚大便不通血欲逆上用當歸承氣湯加桃仁瘀血下而瘥此因元氣不足瘀血得寒而凝聚也故產婦金瘡者不宜食之

一男子孟秋墜梯腹停瘀血用大黃等藥其血不下反加胸膈脹痛喘促短氣薛用肉桂木香末各二錢熱酒調服即下黑血及前所服之藥而蘇此因寒藥凝滯而不行故用辛溫之劑散之

陳侍御墜馬腿痛作嘔服下藥一劑胸腹脹痛按



之即止。惟倦怠少氣。診其脉微細而瀯。予曰。非瘀血也。乃痛傷氣血。復因藥損脾氣而然耳。投養脾胃生氣血之藥而愈。

### 腰痛

儒者王清之跌腰作痛。用定痛等藥不愈。氣血日衰。面目薰色。薛曰。腰爲腎之府。雖曰閃傷。實腎經虛弱所致。遂用杜仲補骨脂五味山茱萸蓉山藥。空心服。又以六君當歸白芍神麴各二錢。食遠服。不月而瘥。

一三歲兒閃腰作痛。服流氣等藥半載不愈。此稟

腎氣不足不治之證也後果歿

陰莖作痛

一患者瘀血失砭脹痛煩渴縱飲涼童便渴脹頓止以蘿蔔細搗塗之瘀血漸散已而患處作痒仍

塗之痒止後口乾作渴小腹引陰莖作痛小便如

淋時出白津此肝經鬱火也遂以小柴胡湯加大

黃黃連山梔飲之諸證悉退再用養血等藥而安

青腫不消

一婦人閃臂腕腫大已三月矣手臂日細肌瘦惡

寒食少短氣脉息細微屬形病俱虛也遂投補中

益氣加肉桂引諸藥以行至臂再加貝母香附以

解久病之鬱。間服和血定痛丸。以葱熨之。腫消二  
三。因怒。患處仍脹。胸膈兩脇微痛。以前湯更加木  
香。山梔。半夏。桔梗。服之少可。後因驚。不寐。少食。盜  
汗。以歸脾湯加五味。麥門。二十餘劑。而安。腫消三  
四。手臂漸肥。但經水過期而少。此心脾之血尚未  
充足而然也。乃用八珍加五味。麥門。丹皮。遠志。貝  
母。桔梗。四十餘劑。諸證悉退。愈後因怒。發熱。譫語。  
經水如湧。此怒動肝火。以小柴胡湯加生地黃。二  
錢。一劑遂止。以四物加柴胡。調理而康。

州守陳克明子閃右臂膊腫痛肉色不變久服流  
氣等藥加寒熱少食舌乾作渴薛曰損傷等證腫  
不消色不變此運氣虛而不能愈當助脾胃壯氣  
血為主遂從法治之不二月形氣漸充腫熱漸消  
半載諸證悉退體臂如常

一小兒閃腿腕壅腫形氣怯弱薛欲治以補氣血  
為主佐以行散之劑不信乃內服沅氣飲外敷寒  
涼藥加寒熱體倦薛曰惡寒發熱脉急洪大氣血  
虛極也治之無功後內潰瀝盡氣血而亡

李考功子十四歲脚腕閃傷腫而色夭日出清膿少許肝脉微瀯此肝經受傷氣血虛而不能潰難治之證也急止尅伐之劑不信乃雜用流氣等藥後果出爛筋而死

腐肉不潰

一患者瘀血已去飲食少思死肉不潰又用托裏之藥膿稍潰而清此血氣虛也非大補不可彼不從薛強用大補之劑飲食進而死肉潰但少寐以歸脾湯加山梔二劑而寐因勞心煩躁作渴脉浮洪大以當歸補血湯二劑而安

一患者受刑太重，外皮傷破，瘀血如注，內肉靡爛，黧腫上胤，胸背下至足指昏噴不食。隨以黑羊皮熱貼患處，灌以童便酒薄粥，更以清肝活血調氣健脾之劑，神思稍蘇。始言偏身強痛，又用大劑養血補氣之藥，腫消食進。時仲冬，瘀血凝結，不能潰膿。又用大補之劑，壯其陽氣，其膿方熟，遂砭去，洞見其骨，塗以當歸膏，及服前藥百餘劑，肌肉漸生。少宗伯劉五清，膝傷一塊微痛，少食用六君子湯，倍加當歸黃芪，其痛漸止。月餘瘀血內涸而不潰。

公以爲痊予曰此陽氣虛極須用調補不從至來  
春頭暈痰涎壅塞服清氣化痰病勢愈甚脉洪大  
而微細欲以參芪歸朮附子之類補之不信至秋  
初因怒昏憤而厥

新肉  
不斂

一患者潰而不斂以內有熱毒欲用寒涼之藥薛  
曰此血氣俱虛而不能斂耳非歸朮參芪之類培  
養脾土則肌肉何由而生豈可復用寒涼剋伐之  
藥重損氣血耶遂用前藥治之而愈

行氣一患者服行氣之劑胸痞氣促食少體倦色黯膿  
之非  
易斗量集  
卷五  
七  
孝色堂

清此形氣俱虛之證也。先用六君桔梗二劑胸膈  
氣和。後用補中益氣去升麻加茯苓半夏五味麥  
門治之。元氣漸復而愈。若用前劑。賊元氣多至  
不救。

之下  
非血

一患者去其患處瘀血。用四物柴胡紅花治之。炊  
痛頓止。後誤服下藥一鍾。連瀉四次。患處色黯喜  
其脉不洪。數乃以十全大補倍加肉桂麥門五味  
數劑。肉色紅活。新肉漸生。喜在壯年。易於調理。又  
月餘而愈。否則不救。凡杖瘡跌撲之證。患處如有



破傷風

瘀血止宜砭去服壯元氣之劑蓋其氣血已損切不可再用行氣下血之藥復損脾胃則運氣愈難營達於下而反爲敗證怯弱者多致夭枉

一患者仲夏傷手腰背反張牙關緊急脉浮而散此表證也遂用羌活防風湯一劑即解此證若在秋冬腠理緻密之時須用麻黃之類以發汗此乃暴傷氣血不損之治法也

一患者杖處畧破而患此脉洪大而實此裏證也用大芎黃湯一劑大便微行一次悉退若投表藥

必死宜急分表裏虛實而治之庶無悞矣

一患者寒熱口乾用四物參芪白朮軟柴炒苓麥  
門五味四劑少退薛欲砭去瘀血不從後怔忡不  
寐飲食少思牙關牽緊頭目疼痛惡寒發熱此膿  
內炊也遂砭去之即安以八珍棗仁麥門五味二  
十劑前證漸愈又用前藥及獨參湯瘀肉漸潰後  
因勞少寐盜汗以歸脾湯麥門五味遠志而痊後  
牙關脹悶面目炊赤又似破傷風仍以爲虛用八  
珍等藥亦安

一患者腹痛喘促作渴寒熱臀腿糜爛與死血相和如皮囊盛糊用童便煎四物桃仁紅花柴胡黃芩麥門花粉服之頓退彼用黑羊皮貼之益甚後砭去膿血甚多氣息奄奄脣口微動牙關緊急患處色黯或欲用破傷風藥薛曰此氣血虛而變證也用參芪芎歸白朮并獨參湯人乳汁元氣復而諸證愈乃用十全大補湯調理而安此證若膿瘀內熾者宜針之若潰後口噤遺尿而類破傷風等證者乃氣血虛極也急用大補之劑若素多痰患

風證者宜清痰降火若因怒而見風證者宜清肝降火若人不慎房勞而忽患前證此由腎水不足心火熾甚宜滋陰補氣血爲主若誤作風證治之即死

發瘕一患者內潰針出膿三五碗遂用大補之劑翌日熱甚汗出足冷口噤腰背反張衆欲投發散之劑薛曰此氣血虛極而變瘕也若認作風治則悞矣用十全大補等藥而愈此證多因傷寒汗下過度與產婦潰瘍氣血虧損所致但當補氣血爲善若

服尅伐之劑多致不救

一患者兩月餘矣瘡口未完因怒發瘰癧瘡口出血此怒動肝火而爲患耳用柴胡芩連山梔防風桔梗天麻釣藤鈎甘草治之頓愈劉宗厚先生云瘰癧有屬風火之熱內作者有因七情怒氣而作者亦有濕熱內盛痰涎壅遏經絡而作者惟宜補虛降火敷土平木消痰去濕

儒門  
事親

戴人出遊道徑故息城見一男子被杖瘡痛熾發毒氣入裏驚涎堵塞牙緊不開粥藥不下前後月

餘百治無功。十分於死。戴人先以三聖散吐青蒼  
驚涎。約半大。次以利膈丸百餘粒下。臭惡燥糞。  
又一大缶。復煎通聖散。數錢熱服之。更以酸辣葱  
醋湯發其汗。斯須汗吐交出。其人活矣。

小渠表三。因強盜入家。傷其兩脇。外臃作瘡。數年  
不已。膿血常涓涓然。但飲冷則瘡間冷水浸淫。而  
生。延爲濕瘡。來求于戴人。曰。爾中焦當有綠水二  
三升。涎數掬。表曰。何也。戴人曰。當被盜時。感驚氣  
入腹。驚則膽傷。足少陽經也。兼兩外臃。皆少陽之

部此膽之甲木受邪甲木色青當有綠水少陽在中焦如瀉既伏驚涎在中焦飲冷水咽爲驚涎所阻隨經而旁瘡中故飲水則瘡中水出乃上涌寒痰汗如流水次下綠水果二三升一夕而痼乾真可怪也

葛塚馮家一小兒七八歲膝被跣跛行行則痛數日矣聞戴人不醫令人問之戴人曰小病耳教來是夜以舟車丸通經散溫酒調而下之夜半涌泄齊行上吐一椀下泄一缶即上牀其小兒爲母曰

膝臍痒不可往來日使服烏金丸壯其筋骨一月疾愈而走矣

一男子落馬發狂起則目瞪妄言不識親疎棄衣而走罵言涌出氣力加倍三五人不能執縛戴人以車輪埋之地中約高二尺許上安之中等車輪其輞上鑿一穴如作盆之狀縛狂病人於其上使之伏卧以軟裯襯之大令一人於下坐機一枚以棒覺之轉千百遭病人吐出青黃涎沫一二斗許繞車輪數匝其病人曰我不能任可解我下從其



言而解之索涼水與之冰水飲數升狂方罷矣  
谷陽鎮酒監張仲溫謁一廟觀匠者砌露臺高四  
尺許因登之下臺胸一足外踝腫起熱痛如火一  
醫欲以銹鍼刺腫出血戴人急止之曰胸已痛矣  
更加鍼二痛俱作何以忍也乃與神祐丸八九十  
丸下二十餘行禁食熱物夜半腫處發痒痛止行  
步如常戴人曰吾之此法十治十愈不誑後人  
名醫類素葛可久善武藝一日見莫經桑弓可久挽之而鼓

歸而下血亟命其子煎大黃四兩飲之其子惡炙

減其半不下問故其子以實對可久曰少耳亦無傷也來年當死今則未也再服二兩愈明年果卒丹溪治一老人墜馬腰痛不可轉側脈散大重取則弦小而長朱曰惡血雖有不可驅逐且補接為先用蘇木參芪芎歸陳皮甘草服半月脈散漸收食進以前藥調下自然銅等藥一月愈

虞恒德治一人因勸鬪毆脅被骨被打破成破傷風頭面大腫發熱虞適見之以九味羌活湯取汗外用杏仁搗爛入白麴少許新汲水調敷瘡下腫

消熱退而愈後累試累驗

一人因結屋墜梯折傷腰勢殊亟夢神授以乳香  
飲其方用酒浸虎骨敗龜黃芪牛膝萆薢續斷乳  
香七品覺而能記服之二旬愈

台州獄吏憫一囚將死頗憐顧之囚感語曰吾七  
犯死罪苦遭訊拷坐是肺腎控損至於嘔血適得  
神方荷君庇拊之恩時此以報只白及一味未飲  
調耳其後凌遲剖者剖其胸見肺數間皆白及填  
塞色猶不變洪貫聞其說為郢州長壽宰規之赴

洋州任一卒忽苦嘔血勢極危貫用此救之一日即止

游讓溪翁云被廷杖時太醫用粗紙以燒酒貼患處手拍血消復易之又用熱豆腐鋪在紫色處其氣如蒸其腐紫色即換須俟傷處紫色散後轉紅為度則易愈矣